

19.3.18

Kerja sampingan kini jadi sumber pendapatan utama

Dulu jadi orang tengah, kini usahakan perniagaan sendiri

MOHD RIDZUAN ABU HASSAN

HULU SELANGOR

Sepasang suami isteri tidak menyangka pekerjaan sampingan sebagai orang tengah mengambil tempahan mencetak baju ketika belajar di universiti kini menjadi sumber pendapatan utama mereka berdua.

Titik perkenalan pasangan itu bermula di universiti sama apabila Muhammad Eqsan Abdullah, 26, mengikuti pengajian Diploma Perhutanan dan Zarina Zainun, 26, bagi Diploma Pertanian di

Universiti Putra Malaysia (UPM) Bintulu.

Zarina berkata, permintaan pelajar senior untuk menempah cetakan baju bagi sesuatu program atau aktiviti memberi pendedahan awal kepadanya mengenai perniagaan tersebut.

Menurutnya, pemilik kedai mencadangkan supaya mengenakan caj tertentu dengan mengambil kira upah perkhidmatan sebagai orang tengah.

"Hampir tiga tahun kami menyediakan perkhidmatan menerima tempahan cetak baju bagi menampung perbelanjaan harian ketika zaman belajar di universiti.

"Hubungan baik dengan pemilik kedai juga membolehkan kami faham dan tahu lebih lanjut mengenai perniagaan percetakan baju dan pelekat."

"Bila tamat pengajian pada 2011, kami ada mohon pekerjaan



Muhammad Eqsan dan Zarina mengusahakan perniagaan percetakan baju dan pelekat dengan menyewa kedai di Bukit Sentosa.

mengikut bidang pengajian namun tiada rezeki," katanya.

Zarina berkata, pengalaman yang diperoleh di universiti mendorong dia memulakan

langkah menceburi perniagaan tersebut sepenuh masa di rumah.

Menurutnya, mereka mendirikan rumah tangga pada 2013 dengan kos perbelanjaan dari

hasil pendapatan percetakan baju dan pelekat.

"Kami masih menjalankan operasi perniagaan di rumah ketika itu dan pernah menyewa sebuah bangunan kilang namun tidak bertahan lama kerana kos yang tinggi.

"Alhamdulillah pada tahun lepas, kami menyewa sebuah kedai dan membeli beberapa mesin pencetak secara berperingkat yang kini beroperasi di Bukit Sentosa (belakang Masjid Saidina Ali)," katanya.

Zarina berkata, walaupun terdapat saingan daripada pengusaha lain namun kedai mereka menawarkan harga yang berpatutan apabila mengutamakan kualiti demi kepuasan pelanggan.

Menurutnya, perniagaan yang diusahakan itu jauh berbeza dari bidang pengajian yang dipelajari ketika di universiti namun ia bukan halangan untuk berjaya.